

► Kategori: Akidah

Status Pewartaan: Diwartakan

Tahun: 2016

934

WARTA KERAJAAN NEGERI SEMBILAN

[24hb Nov. 2016]

No. 471.

ENAKMEN PENTADBIRAN AGAMA ISLAM
(NEGERI SEMBILAN) 2003

[Enakmen No. 10/2003]

PEMBERITAHUAN FATWA
PENYELEWENGAN AJARAN AL ARQAM

Pada menjalankan kuasa yang diberikan oleh seksyen 49 Enakmen Pentadbiran Agama Islam (Negeri Sembilan) 2003 [Enakmen No. 10/2003], Jawatankuasa Fatwa dengan perkenan Yang di-Pertuan Besar dan dengan persetujuan Yang Teramat Mulia Undang Yang Empat dan Tengku Besar Tampin, mengeluarkan fatwa seperti yang berikut:

1. Bahawa ajaran dan fahaman al-Arqam yang dibawa oleh Haji Ashaari bin Muhammad adalah bercanggah dan menyeleweng daripada pegangan Ahli al-Sunnah wa al-Jamaah.
2. Ajaran dan fahaman ini perlu disekat keseluruhannya dari berkembang di Negeri Sembilan berdasarkan terdapat beberapa percanggahan di dalam fahaman tersebut sama ada dari sudut akidah, syariah dan akhlak.
3. Antara ciri-ciri penyelewengan ajaran dan fahaman al-Arqam adalah seperti yang berikut:
 - (i) Haji Ashaari bin Muhammad ialah Sahibul Zaman (Mujaddid) manakala Syeikh Muhammad al-Suhaimi pula adalah Imam Mahdi;
 - (ii) Haji Ashaari bin Muhammad mendapat ilmu langsung daripada Syeikh Muhammad al-Suhaimi dan Rasulullah SAW;
 - (iii) Haji Ashaari bin Muhammad sebagai Sahibul Zaman (Mujaddid) mendapat ilmu terus daripada Allah (ilham, ilmu ladunni, atau kasyaf) yang meliputi soal agama, dunia, hal ehwal semasa, pemerintahan, bina insan dan lain-lain;
 - (iv) perjuangan Haji Ashaari bin Muhammad dan pengikutnya dibantu dan dilindungi oleh para Rijal Ghaib yang terdiri daripada para malaikat, jin Islam dan roh-roh muqaddas (roh suci para ahli jamaah yang telah meninggal dunia);
 - (v) amalan Aurad Muhammadiyah ialah zikir agung;
 - (vi) pengikut yang beramal dengan Aurad Muhammadiyah akan sentiasa dipantau dan dibimbing secara rohaniah oleh Haji Ashaari bin Muhammad;
 - (vii) ibadat solat Jumaat tidak wajib kerana kerajaan yang ada sekarang bukan kerajaan Imam Mahdi;

- (viii) solat dalam sehari semalam hanya tiga waktu sahaja iaitu Solat Subuh, Solat Jamak Zuhur dan Asar dan Solat Jamak Maghrib dan Isyak;
 - (ix) ulama yang ada sekarang ialah ulama kitab atau ulama hafalan yang bergantung kepada kitab dan hafalan untuk mengajar. Sebaliknya, Haji Ashaari bin Muhammad sebagai Sahibul Zaman mendapat ilmu terus daripada Tuhan; dan
 - (x) ilmu ulama sekarang tidak setanding dengan ilmu orang Tuhan iaitu Haji Ashaari bin Muhammad.
4. Oleh yang demikian Jawatankuasa Fatwa Negeri Sembilan mengambil keputusan bahawa apa-apa jua ajaran atau fahaman Islam yang bertentangan dengan pegangan Ahli al-Sunnah wa al-Jamaah adalah dilarang terutamanya ajaran dan fahaman al-Arqam. Larangan itu meliputi:
- (a) untuk mengajar, mempelajari, mengamalkan, berpegang kepada atau menyebarkan ajaran-ajaran atau fahaman-fahaman yang terkandung di dalam ajaran dan fahaman al-Arqam; atau
 - (b) untuk menjadi anggota atau pemimpin mana-mana golongan al-Arqam atau membantu dalam menghidupkan atau mengembangkan kumpulan sedemikian; atau
 - (c) untuk menerbitkan apa-apa bentuk versi atau variasi atau apa-apa terjemahannya dalam apa-apa bahasa atau apa-apa bahan publisiti, sama ada bahan cetak atau elektronik atau selainnya atau melalui apa-apa media, atau apa-apa kaedah yang boleh membawa kepada penyebaran ajaran-ajaran tersebut; atau
 - (d) untuk memiliki, menyimpan, mencetak, menjual termasuk mengedarkan filem, rakaman audio, risalah, buku-buku, majalah atau apa-apa terbitan, atau apa-apa dokumen, menggunakan sebarang bentuk lambang, rajah atau tanda-tanda yang boleh mengaitkan ajaran atau fahaman al-Arqam dengan ajaran Islam.
5. Pemberitahuan Fatwa yang dikeluarkan melalui N.S. P.U. 20/1994 bertarikh 4 Ogos 1994 adalah dibatalkan.

Dibuat 14 September 2016

[JMKNNNS.BPK. 100-32/1: PUNS 100/2/4]

DATO' HJ. MOHD YUSOF BIN HJ. AHMAD
*Mufti Kerajaan Negeri
Negeri Sembilan*